

PM Turki tiba

hari ini

Bahan asal dari Arab

Negara Malaysia

untuk lawatan

rasmi lima hari

KUALA LUMPUR, Ahad — Perdana Menteri Turki, Encik Bulend Ulusu akan tiba di sini esok untuk memulakan lawatan rasmi lima hari bertujuan mengeratkan lagi kerjasama ekonomi dan kebudayaan antara negaranya dengan Malaysia.

Di samping beberapa perbincangan dengan Datuk Seri Dr Mahathir Mohamad, Perdana Menteri Turki itu akan diberi penjelasan mendalam mengenai rancangan pembangunan sosio-ekonomi Malaysia termasuk lawatan ke skim Felda Trolak, Perak, kata seorang pegawai Kementerian Luar di sini, hari ini.

Tujuan utama lawatan Encik Ulusu ke sini ialah untuk mendapatkan kerjasama lebih erat dalam bidang perdagangan dan ekonomi, katanya.

Dalam perbincangannya dengan Perdana Menteri Malaysia, Encik Ulusu dijangka menyentuh kemajuan beberapa persetujuan yang tercapai dalam lawatan rasmi Datuk Seri Dr Mahathir ke Turki baru-baru ini.

Kedua-dua pemimpin itu akan mengkaji semula beberapa tindakan susulan yang telah dilakukan oleh beberapa orang pegawai dari sektor swasta kedua-dua negara untuk mempelbagaikan perdagangan, meningkatkan kerjasama ekonomi serta menggalakkan usahasama perindustrian antara kedua-dua negara.

"Turki berminat untuk membaiki imbangan perdagangan yang kini lebih banyak menguntungkan Malaysia," kata pegawai itu.

Malaysia mencatatkan lebihan dagangan \$55.5 juta dari jumlah dagangan \$63.37 juta dengan Turki tahun lalu.

Katanya, eksport Malaysia kebanyakannya adalah barangan utama seperti getah dan minyak sayuran. Sementara import dari Turki sebahagian besarnya adalah kapas dan buah-buahan kering.